



Uzroci sreće (Rijad)

Hatib: dr. Ibrahim b. Muhammed el-Hukajl

15. rebiul-evvel 1448. po Hidžri / 28. august 2026.

Hvala Allahu. Njega hvalimo, od Njega pomoć i oprost tražimo. Allahu se utječemo od zla naših duša i naših loših djela. Koga Allah uputi, niko ga ne može u zabludu odvesti, a koga On u zabludi ostavi, niko ga ne može uputiti. Svjedočim da nema boga osim Allaha, Jedinog, Koji nema sudruga, i svjedočim da je Muhammed Njegov rob i poslanik.

Uzvišeni kaže: "O vi koji vjerujete, bojte se Allaha istinskom bogobojažnošću i nipošto ne umirite osim kao muslimani!" "O ljudi, bojte se Gospodara svoga, koji vas od jednog čovjeka stvara, a od njega je i drugu njegovu stvorio, i od njih dvoje mnoge muškarce i žene rasijao. I Allaha se bojte – s imenom čijim jedni druge molite – i rodbinske veze ne kidajte, jer Allah, zaista, stalno nad vama bdi."

"O vjernici, bojte se Allaha i govorite samo istinu, On će vas za vaša dobra djela nagraditi i grijehе vam vaše oprostiti. A onaj ko se Allahu i Poslaniku Njegovu bude pokoravao – postići će ono što bude želio."

Najistinitiji govor jeste Allahov govor, a najbolja uputa jeste uputa Allahovog poslanika Muhammeda, sallallahu alejhi ve sellem. Najgore stvari jesu novotarije u vjeri; svaka novotarija je zabluda, a svaka zabluda vodi u Vatru.

O ljudi! Sreća je cilj kojem se teži, čežnja za kojom duše tragaju i izgubljeno blago za kojim svi ljudi žude: bogati i siromašni, ugledni i neugledni, učeni i neuki. Neki ljudi misle da se sreća nalazi u visokom položaju, obilju imetka ili neobuzdanom prepuštanju strastima. Međutim, to je pogrešno mišljenje, jer je mjesto sreće srce, a srcima ne upravlja niko osim Uzvišenog Allaha: "...i neka znate da se Allah upliće između čovjeka i srca njegova..." Zato se sreća traži samo od Njega, slavljen neka je, i pronalazi se samo u Njegovom zadovoljstvu.





Govorit ćemo o najvećim i najvažnijim uzrocima sreće, a to su:

- Vjerovanje i činjenje dobrih djela

Uzvišeni Allah kaže: "Onome ko čini dobro, bio muškarac ili žena, a vjernik je, Mi ćemo dati da proživi lijep život..." Ovo je obećanje Onoga Koji je stvorio čovjeka i najbolje ga poznaje: da će lijep život postići vjerovanjem i činjenjem dobrih djela. A ima li veće sreće od toga da čovjek živi lijepim životom?!

- Zadovoljstvo Allahom i lijepo mišljenje o Njemu

Najveću tjeskobu u ljudskim prsima izazivaju brige vezane za određenu im opskrbu i životne okolnosti, kao i nedaće i iskušenja koja su im propisana. Ko je zadovoljan Allahom kao svojim Gospodarom i zadovoljan je Njegovom odredbom, Allah će ga učiniti zadovoljnim. A ko je zadovoljan onim čime je opskrbljen, njegovo će se srce odmoriti od iscrpljujuće čežnje za onim što posjeduju drugi ljudi. Vjerovjesnik, sallallahu alejhi ve sellem, rekao je: "Uspio je onaj ko primi islam, bude opskrbljen onoliko koliko mu je dovoljno i kome Allah podari zadovoljstvo onim što mu je dao."

- Traženje oprosta i pokajanje Uzvišenom Allahu

Griješni opterećuju srce i zbog njih prsa postaju tijesna, dok istigfar briše grijehe i njime se otvaraju vrata koja se ne otvaraju ničim drugim. Uzvišeni Allah prenosi riječi Nuha, alejhis-selam: "I govorio sam: 'Tražite od Gospodara svoga oprost jer On, doista, mnogo prašta; On će vam kišu obilnu slati i pomoći vas imanijima i sinovima, i dat će vam bašče, i rijeke će vam dati.'" (Nuh, 10–12) Istigfar donosi olakšanje od briga i nevolja, olakšava poslove i otvara vrata opskrbe.

- Prelaziti preko propusta članova porodice i djece, opraštati onima koji pogriješe i imati čista prsa prema ljudima, bez zlobe i netrpeljivosti.

Mržnja i zlopamćenje vatra su koja najprije izjeda srca onih koji ih nose, prije nego što naude drugima, dok su oprost i praštanje smiraj koji gasi vatru zlobe i netrpeljivosti. Uzvišeni Allah kaže: "...a onoga koji oprosti i izmiri se Allah će nagraditi." Vjerovjesnik, sallallahu alejhi ve sellem, rekao je: "Allah robu koji prašta





samo povećava ugled." Imam Ahmed rekao je: "Blagostanje se sastoji od deset dijelova, a svih deset je u prelaženju preko tuđih propusta."

- Baviti se korisnim poslom ili stjecati znanje koje koristi čovjeku ili kojim on koristi drugima

Besposlica je grobnica u kojoj se ukopava sreća i plodno tlo za šejtanske vesvese i crne misli. Kada čovjek ostavi sebe bez korisnog posla, na njega navale brige i tjeskobe, pa vrijeme provodi u maštanjima i iluzijama, hraneći se uspomenama na bolnu prošlost ili strahovima od nepoznate budućnosti. Zato je jedan od puteva sreće da čovjek svoje vrijeme ispuni onim što mu koristi u vjeri ili dunjalučkom životu.

Jedan od uzroka sreće jeste i čestitost ukućana – supruge i djece. Jedna od kur'anskih dova jeste: "Gospodaru naš, podari nam u ženama našim i djeci našoj radost i učini da se čestiti na nas ugledaju!" Vjerovjesnik, sallallahu alejhi ve sellem, rekao je: "Dunjalučluk je prolazno uživanje, a najbolji dunjalučki užitek jeste čestita žena." Ko vidi svoju porodicu kao čestitu, uspješnu i pokornu Allahu, srce mu se ispuni radošću i veseljem. Oni mu budu radost očiju za života svojom pokornošću i nastojanjem da ga obraduju, a nakon njegove smrti svojim dovama za njega.

- Na blagodati odgovoriti zahvalnošću, a na iskušenja zadovoljstvom i strpljivošću, pa cijeli život čovjeka bude između zahvalnosti i strpljivosti

Ako ga zadesi dobro, zahvali Uzvišenom Allahu na tome, kako bi mu Allah još više dao i blagoslovio ono čime ga je obdario: "Ako budete zahvalni, Ja ću vam, zacijelo, još više dati." A ako ga zadesi ono što mu nije drago, bude zadovoljan Allahovom odredbom, strpi se i nada se nagradi, kako bi mu teret iskušenja bio lakši i kako bi bio nagrađen za ono što ga je zadesilo. Vjerovjesnik, sallallahu alejhi ve sellem, rekao je: "Veličina nagrade srazmjerna je veličini iskušenja. Kada Allah zavoli neki narod, stavi ga na kušnju; ko bude zadovoljan, njemu pripada Allahovo zadovoljstvo, a ko bude nezadovoljan, njemu pripada srdžba." (Tirmizi i Ibn Madža) Zbog toga se Vjerovjesnik, sallallahu alejhi ve sellem, zadivio stanju vjernika, koji se neprestano kreće između zahvalnosti i strpljivosti, pa je rekao: "Čudno je stanje vjernika! Zaista





je svako njegovo stanje dobro, a to nije dato nikome osim vjerniku: ako ga zadesi nešto lijepo, zahvali Allahu, pa to bude dobro za njega; a ako ga zadesi nevolja, strpi se, pa i to bude dobro za njega."

- Usmjeravanje svih misli na ono što čovjek trenutno radi i prekidanje vezanosti za prošlost i budućnost

Čovjek najčešće pati zbog jedne od dvije stvari: ili zbog tuge za prošlošću, koja je prošla i ne može se vratiti, ili zbog brige za budućnost, koja tek dolazi i kojom ne može upravljati.

- Navikavanje duše na podnošenje uznemiravanja ljudi

Mnogi ljudi izgube svoju sreću zbog jedne riječi koja je o njima izrečena ili kritike koja im je upućena, pa neprestano u sebi obnavljaju bol i mržnju zbog toga i troše na to svoje vrijeme i misli više nego što to zaslužuje. Kada bi se na to ne osvrтали i kada bi to prepustili zaboravu, takve riječi ne bi naštetile nikome osim onome ko ih je izgovorio. Uzvišeni Allah kaže: "Ti sa svakim lijepo! I traži da se čine dobra djela, a neznalica se kloni!" (El-A'raf, 199)

- Ne vezivati srce za ono što je u rukama ljudi i ne žudjeti za onim što oni posjeduju

Vjerovjesnik, sallallahu alejhi ve sellem, rekao je: "Budi skroman prema dunjaluku, voljet će te Allah, i ne žudi za onim što ljudi posjeduju, voljet će te ljudi." Ko prekine svoju žudnju za onim što ljudi posjeduju, njegovo će se srce odmoriti i životu će pristupati dostojanstvene i neovisne duše. A ko stalno gleda prema onome što ljudi posjeduju, bit će ponižen pred njima i od njih neće dobiti ništa osim onoga što mu je već određeno. Vjerovjesnik, sallallahu alejhi ve sellem, rekao je: "Gledajte u onoga ko je ispod vas, a ne gledajte u onoga ko je iznad vas, jer je tako preče da ne omalovažavate Allahove blagodati prema vama."

- Ne porediti ono što je čovjeku dato s onim što je dato drugima

Jedan od najvećih uzroka nesreće i nezadovoljstva jeste da čovjek neprestano poredi ono što je njemu dato s onim što je dato drugima. Tako postaje nesretan i tjeskoban,





a srce mu izjeda ljubomora i zavist, iako od dunjaluka neće dobiti ništa osim onoga što mu je već određeno.

Jedan od uzroka sreće jeste i dobročinstvo prema roditeljima, jer ono ima zadivljujući utjecaj na sreću i smirenost srca. Uzvišeni Allah prenosi da je Isa, alejhis-selam, kada je progovorio u kolijevci, rekao: "...i da majci svojoj budem dobar, a neće mi dopustiti da budem drzak i nepristojan." Tako ga je nesreća mimoišla zbog dobročinstva prema majci. Uzvišeni Allah izbavio je i ljude koji su ostali zarobljeni u pećini, jer Mu se jedan od njih u dovi približio spominjući svoje dobročinstvo prema roditeljima. Abdullaha b. Amra b. Asa, radijallahu anhum, prenosi da je Allahov Poslanik, sallallahu alejhi ve sellem, rekao: "Zadovoljstvo Gospodara je u zadovoljstvu roditelja, a srdžba Gospodara je u srdžbi roditelja", a Ibn Hibban ga je ocijenio vjerodostojnim. A kada je Uzvišeni Allah zadovoljan Svojim robom, njegovo srce ispuni srećom, radošću i smirenošću.

- Održavanje rodbinskih veza

Održavanje rodbinskih veza uzrok je produženja života i povećanja imetka ili bereketa, a to je jedan od velikih uzroka sreće. Nestanak bereketa, s druge strane, put je ka nesreći. Vjerovjesnik, sallallahu alejhi ve sellem, rekao je: "Ko želi da mu se poveća opskrba i produži život, neka održava rodbinske veze." Onaj ko održava rodbinske veze omiljen je među svojom rodbinom upravo zbog toga što ih obilazi i održava vezu s njima, a ljubav ljudi prema čovjeku raduje ga i usrećuje. Ibn Omer, radijallahu anhum, rekao je: "Održavanje rodbinskih veza produžava život, donosi ljubav porodice i povećava imetak." Stoga svaki razuman čovjek treba nastojati da postigne uzroke sreće i da im teži kao onaj ko je svjestan da je život kratak i da su dani rizične djela. Istinski je upućen onaj ko ne prepusti svoj život nemaru niti svoje srce brigama, nego svoje dane ispuni onim što mu širi prsa, pročišćava dušu i uzdiže njegov stepen, sve dok ne sretne Uzvišenog Allaha čista srca i smirene duše.

Molimo Uzvišenog Allaha da nas poduči onome što će nam koristiti i da nam podari da postupamo prema onome čemu nas je podučio. On, doista, sve čuje i odaziva se dovama.





"KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJE
KOJU TOKOM HUTBE ELABORIRA." (PREPOROD)

HUTBE 

Zato, poštovani vjernici, donosite salavate i selame na darovanu milost i nepresušnu blagodat, na svoga vjerovjesnika Muhammeda, Allahovog poslanika. To vam je naredba od vašeg Gospodara: "Allah i meleki Njegovi blagosilju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56).

